



Us ài contade chê di 'gne Miute; ve ca cumò chê di Bruneto, un gno compagn di banc, une paste di zovin.

Duncje, finidis lis medis, o soi lade a scuele a Udin.

Là, jenfri une sdrume di professôrs, al jere un che al rivave de basse Italie.

Al veve un difietut di pronunzie tal talian, ma nissun al veve fiât di dâi dal teron, parcè che al jere un bon cristian, che al cirive di judâ no di freâ. E po... parcè che al jere un toc di om che mai.

Par fâle curte, a Bruneto i à tocjât di jessi il prin interogât.

Il professôr bot e sclop:

- Dimme a cappetale de Greccia.

Bruneto, bocje vierte e voi scocolâts, i sigurave di vê il non su la ponte de lenghe, dome che no i vignive fûr.

Si sfuarçave di fâ dôl ai claps, ma nuie di fâ: no i vignive tal cjâf il non di chê Capitâl.

Alore il professôr che, come che o ài dit, al jere un bon om:

- Te voggio iutà, Brruno: a-tenè o non a-tenè in ta capa?

Ma lui ancjemò cidin; anzit nus cjalave nô dut stupidît.

Intai ultins bancs, a scomençavin a remenasi su la cjadree par no ridi.

- Ah, Brruno, Brruno... gnente a-tenè in ta capa.

E jù ducj a ridi intant che Bruneto mi mugugnave:

- Porcofûr a ti e ancje a lôr... e di bon che al voleve judâmi, chel mostri di professôr.

Cussì e je lade inta chê volte.

Vuê no sucedarès di sigûr: si dispatùssisi prin cu lis lenghis.

... Forsit ancje masse: cun dutis lis cjadencis che si sintin ator, si riscje di capîsi simpri

mancul.

di Maghe Olstrele